

四庫全書

經部

按：本冊原書於抗戰播遷中曾遭水漬，致字跡模糊不清，茲雖力經描修版面，仍無法全復舊觀。

欽定四庫全書

經部
五禮通考卷九

詳校官監察御史_臣范哀

給事中_臣溫常綬覆勘

總校官進士_臣繆琪

校對官中書_臣徐步雲

謄錄監生_臣王叔愚

欽定四庫全書

五禮通考卷九

刑部尚書秦蕙田撰

吉禮九

圜丘祀天

唐書高祖本紀武德四年十一月甲申有事于南郊

蕙田案此郊舊書不載疑刻本之脫

舊唐書禮儀志武德初定令每歲冬至祀昊天上帝於

圜丘以景帝配其壇在京城明德門外道東二里壇制
四成各高八尺一寸下成廣二十丈再成廣十五丈三
成廣十丈四成廣五丈每祀則昊天上帝及配帝設位
于平座藉用橐秸器用陶匏五方上帝日月內官中官
外官及衆星並皆從祀其五方帝及日月七座在壇之
第二等內官五星以下五十五座在壇之第三等二十
八宿以下百三十五座在壇之第四等外官百一十二
座在壇下外壇之內衆星三百六十座在外壇之外其

牲上帝及配帝用蒼犢二五方帝及日月用方色犢各一內官以下加羊豕各九

唐書禮樂志園丘壇北辰北斗天一太一紫微五帝座並差在行位前餘內官諸座及五星十二辰河漢四十九座在第二等十有二陞之間中官市垣帝座七公日星帝座大角攝提太微五帝太子明堂軒轅三台五車諸王月星織女建星天紀十七座及二十八宿差在前列其餘中官一百四十二座皆在第三等十二陞之間

外官一百五在內壝之內衆星三百六十在內壝之外
五星三辰以象尊實醴齊七宿以壺尊實沈齊皆二五
星十二辰二十八宿籩豆各二簋簋俎各一四時祭風
師雨師靈星司中司命司人司祿籩八豆八簋一簋一
俎一牲皆少牢席皆以莞

蕙田案冬至祀圜丘之禮至武德乃得其正
開國規模邈然遠矣

唐書太宗本紀貞觀二年十一月辛酉有事于南郊

裴寂傳貞觀二年太宗祠南郊命寂與長孫無忌同
升金輅寂辭讓太宗曰以公有佐命之勲無忌亦宣
力於朕同載參乘非公而誰遂同乘而歸

劉黑闥傳初秦王建天策府其弧矢制倍于常後餘
大弓一長矢五藏之武庫每郊丘重禮必陳于儀物
之首以識武功云

五年十一月丙子有事于南郊

禮樂志自周衰禮樂壞於戰國而廢絕於秦漢興六經

在者皆錯亂散亡雜偽而諸儒方共補緝以意解詁未得其真而讖緯之書出以亂經矣自鄭玄之徒號稱大儒皆主其說學者由此牽惑沒溺而時君不能斷決以為有其舉之莫可廢也由是郊丘明堂之論至于紛然而莫知所止禮曰以禋祀祀昊天上帝此天也玄以為天皇大帝者北辰耀魄寶也又曰兆五帝於四郊此五行精氣之神也玄以為青帝靈威仰赤帝赤熛怒黃帝含樞紐白帝白招拒黑帝汁光紀者五天也由是有六

天之說後世莫能廢焉唐初貞觀禮冬至祀昊天上帝于圜丘正月辛日記感生帝靈威仰於南郊以祈穀而孟夏雩于南郊季秋大享于明堂皆祀五天帝其配神之主貞觀初圜丘明堂北郊以高祖配而玄宗唯配感帝

蕙田案郊丘之論自漢以後紛然矣此志叙述原委簡括詳明至是人始知六天之謬而貞觀禮所定冬至圜丘孟春祈穀孟夏雩祀

李秋明堂卓然與經典合儒者之效遂開有
唐一代制作厥後開元禮成而五典燦然明
備矣後代禮樂之得其正實賴貞觀禮為之
權輿太宗之治所以煥然不同也然南郊祀
靈威仰圜丘雩祀明堂皆祀五天帝尚未能
革鄭氏信讖之流弊深哉

舊唐書音樂志冬至祀昊天於圜丘樂章八首

貞觀二年祖孝

孫定雅樂貞觀六年褚亮虞
世南魏徵等作此詞今行用

降神用豫和 上靈賸命兮膺會昌盛德殷薦叶辰
良景福降兮聖德遠玄化穆兮天歷長

皇帝行用太和 穆穆我后道應千齡登三處大得

一居貞禮惟崇德樂以和聲百神仰止天下文明

登歌奠玉帛用肅和 闔陽播氣甄耀垂明有赫圓

宰深仁曲成日嚴蒼壁煙開紫營聿遵虔享式降鴻

禎

迎俎入用雍和 欽惟大帝載仰皇穹始命田燭爰

啟郊宮雲門駭聽雷鼓鳴空神其介祀景祚斯融

酌獻飲福用壽和 八音斯奏三獻畢陳寶祚惟永

輝光日新

送文舞出迎武舞入用舒和 壘壁凝影皇壇路編

珠流彩帝郊前已奏黃鐘歌大呂還符寶歷祚昌年

武舞用凱安 昔在炎運終中華亂無象鄭郊赤鳥

見却山黑雲上大賚下周軍禁暴開殷網幽明何叶

贊鼎祚齊天壤

送神用豫和 歌奏畢兮禮獻終六龍馭兮神將昇

明德感兮非黍稷降福簡兮祚休徵

又郊天樂章一首

太樂舊有此辭
名不詳所起

送神用豫和

蘋繁禮著黍稷誠微音盈鳳管彩駐

龍旂洪歆式就介福攸歸送樂有闋靈馭遄飛

唐書太宗本紀貞觀十四年冬十一月甲子朔日南至
有事于園丘 十七年十一月己卯有事于南郊

蕙田案此二郊新舊書並載馬氏通考以十

七年為八月四日而脫去十四年但云一闕
年月皆採輯之誤

冊府元龜 貞觀十七年十月甲寅詔曰朕聞上靈之應
疾於影響茂祉之興積於年代朕嗣膺寶歷君臨區宇
憑宗社之介福賴文武之同心時無風塵之警野有京
坻之積厚地降祉貞石來翔營翠色而流光發素質而
成字前紀厥功之德次陳卜年之永後述儲貳之美並
名字昭然楷則相次曠代之所未聞故老之所未覩自

天之祐豈惟一人無疆之福方覃九土自非大報泰壇
稽首上帝則靡由奉天之志寧副臨下之心今年冬至
有事南郊所司率由舊典十一月己卯有事於南郊太
宗升壇皇太子從奠於時累日陰雪是旦猶雲霧晦冥
及太宗升壇烟氛四散風景清朗文物昭映禮畢祝官
讀謝天祝文曰嗣天子臣世民敢昭告于昊天上帝世
民纂成鴻基君臨宇縣夙興旰食無忘于政道導德齊
禮良愧于前聖爰有成命表貞瑞石文字昭然歷數惟

永旣旌高廟之業又錫助身之祚逮于皇太子某亦降
禎符並具紀姓氏兼列名字仰瞻雲漢實銘大造俯惟
寡薄彌增寅懼敢因大禮重薦玉帛上謝明靈之貺以
申祗慄之誠皇太子亦恭至泰壇虔拜于蒼昊庶因眷
祐之德永膺無疆之休初十六年太宗遣刻受命元玉
璽白玉為螭首其文云皇天景命有德者昌並神筆隸
書然後鐫勒是日侍中負之以從

唐書高宗本紀永徽二年冬十一月辛酉有事于南郊

禮樂志高宗永徽二年以太宗配祀明堂而有司乃以高祖配五天帝太宗配五人帝太尉長孫無忌等與禮官議以謂自三代以來歷漢魏晉宋無父子同配於明堂者祭法曰周人禘饗而郊稷祖文王而宗武王鄭玄以祖宗合為一祭謂祭五帝五神于明堂以文武共配而王肅駁曰古者祖功宗德自是不毀之名非謂配食于明堂春秋傳曰禘郊祖宗報五者國之典祀也以此知祖宗非一祭于是以高祖配于圜丘太宗配于明堂

蕙田案自晉宋以後諸人議配帝唯此為的
當駁鄭氏極是

通典永徽二年太尉長孫無忌等奏議曰據祠令及新
禮並用鄭玄六天之義圜丘祀昊天上帝南郊祀太微
感帝明堂祭太微五天帝臣等謹案鄭玄此義唯據緯
書所說六天皆為星象而昊天上帝不屬穹蒼故注月
令及周官皆謂圜丘所祭昊天上帝為北辰星曜魄寶
又說孝經郊祀后稷以配天明堂嚴父配天皆為太微

五帝考其所說舛謬特深按易云日月麗乎天百穀草木麗乎土又云在天成象在地成形足以明辰象非天草木非地毛詩傳云元氣昊大則稱昊天遠視蒼蒼則稱蒼天此則天以蒼昊為體不入星辰之例且天地各一是為兩儀天尚無二焉得有六是以王肅羣儒咸駁此義又檢太史圜丘圖昊天上帝座外別有北辰座與鄭義不同得太史令李淳風等狀稱昊天上帝圖位自在壇上北辰自在第二等與北斗並列為星官內座之

首不同鄭玄據緯之說此乃羲和所掌觀象制圖推步
有恒相緣不謬又案史記天官書等太微宮有五帝者
自是五精之神五星所奉以其是人主之象故況之曰
帝亦如房星為天王之象豈是天乎周禮云兆五帝於
四郊又云祀五帝則掌百官之誓戒唯稱五帝皆不言
天此自太微之神本非穹昊之祭又孝經唯云郊祀后
稷別無圜丘之文王肅等以為郊即圜丘圜丘即郊猶
王城京師異名同實符合經典其義甚明而今從鄭之

說分為兩祭園丘之外別有南郊違棄正經理深未允
且檢吏部式唯有南郊陪位更不別載園丘式文既遵
王肅祀令仍行鄭義今式相乖理宜改革又孝經云嚴
父莫大於配天下文即云周公宗祀文王於明堂以配
上帝則是明堂所祀正在配天而以為但祭星官反違
明義詔從無忌等議存祀太微五帝于南郊廢鄭玄六
天之義

蕙田案五帝非天郊丘非二所議真如撥雲

霧也舊唐書志以此列顯慶二年上議之人
亦作許敬宗等未知孰是然祁公去高宗時
較近今姑從杜

禮部尚書許敬宗等又奏稱於新禮祭畢收取玉帛牲
體置於柴上然後燔柴燔壇又在神壇之左臣等謹案
祭祀之禮必先降神周人尚臭祭天則燔柴祭地則瘞
血祭宗廟則燭蕭灌鬯皆貴氣臭用以降神禮經明白
義釋甚詳燔柴在祭初禮無所惑是以三禮義宗等並

云祭天以燔柴為始然後行正祭祭地以瘞血為先然後行正祭又禮說晉太常賀循上言積柴舊在壇南燎祭天之牲用犢左胖漢儀用頭今郊天用脇之九介太宰令奉牲脅太祝令奉珪瓚俱奠燔薪之上即晉代故事亦無祭末之文唯周魏以降妄為損益約告廟之幣事畢瘞埋因改燔柴將為祭末事無典實禮闕降神又燔柴正祭牲玉皆別蒼璧蒼犢之流柴之所用四珪駢犢之屬祝之所須故郊天之有四珪猶廟之有珪瓚是

以周官典瑞文義相因並事畢收藏不在燔柴之例今
新禮引同蒼壁不顧珪瓚遂亦俱燔義既有乖理難因
襲詔從之

蕙田案祭畢燔柴牲玉同燎非禮違經至是
乃革

舊唐書禮儀志敬宗等又議籩豆之數曰案今光祿式
祭天地日月岳鎮海瀆先蠶等籩豆各四祭宗廟籩豆
各十二祭社稷先農等籩豆各九祭風師雨師籩豆各

二尋此式文事深乖謬社稷多於天地似不貴多風雨少於日月又不貴少且先農先蠶俱為中祭或六或四理不可通又先農之神尊於釋奠籩豆之數先農乃少理既差舛難以因循謹案禮記郊特牲云籩豆之薦水土之品不敢用褻味而貴多品所以交於神明之義也此即祭祀籩豆以多為貴宗廟之數不可踰郊今請大祀同為十二中祀同為十小祀同為八釋奠準中祀自餘從座並請依舊式詔並可之遂附于禮令

唐書高宗本紀總章元年十二月丁卯有事于南郊

蕙田案此郊舊書不載疑刻本脫 又案通

考作十一月疑誤

舊唐書高宗本紀咸亨四年十一月丙寅上製樂章
有上元二儀三才四時五行六律七政八風九宮十
洲得一慶雲之曲詔有司諸大祠享即奏之

上元三年十一月丁卯勅新造上元舞園丘方澤享
太廟用之餘祭則停

唐書韋萬石傳上元中遷太常少卿當時郊廟燕會
樂曲皆萬石與太史令姚元辯增損之

舊唐書禮儀志乾封初高宗東封迴又詔依舊祀感帝
及神州司禮少常伯郝處俊等奏曰顯慶新禮廢感帝
之祀改為祈穀昊天上帝以高祖太武皇帝配檢舊禮
感帝以世祖元皇帝配今既奉勅依舊復祈穀為感帝
以高祖太武皇帝配神州又高祖依新禮見配圓丘昊
天上帝及方丘皇地祇若更配感帝神州便恐有乖古

禮案禮記祭法云有虞氏禘黃帝而郊嚳夏后氏亦禘黃帝而郊鯀殷人禘嚳而郊冥周人禘嚳而郊稷鄭玄注云禘謂祭上帝於南郊又案三禮義宗云夏至郊天者王者各祭所出帝於南郊即大傳所謂王者禘其祖之所自出以其祖配之是也此則禘須遠祖郊須始祖今若禘郊同用一祖恐於典禮無據

乾封二年十二月詔曰昔周京道喪秦室政乖禮樂淪亡經典殘滅遂使漢朝博士空說六宗之文晉代鴻儒

爭成七祀之義或同昊天於五帝或分感帝於五行自
茲遞相祖述紛紜莫定自今以後祭圜丘五方明堂感
帝神州高祖太武皇帝太宗文武皇帝配仍總祭昊天
上帝及五帝於明堂

唐書禮樂志則天垂拱元年詔有司議卒用元萬頃范
履冰之說郊丘諸祠以高祖太宗高宗並配

沈伯儀傳垂拱元年成均助教孔玄義奏嚴父莫大配
天天於萬物為最大推父偶天孝之大尊之極也易稱

先王作樂崇德殷薦之上帝以配祖考上帝天也昊天
之祭宜祖考並配請以太宗高宗配上帝於園丘神堯
皇帝配感帝南郊祭法祖文王宗武王祖始也宗尊也
一名而有二義經稱宗祀文王文王當祖而云宗包武
王以言也知明堂以祖考配與二經合伯儀曰有虞氏
禘黃帝而郊嚳祖顓頊而宗堯夏后氏禘黃帝而郊鯀
祖顓頊而宗禹殷人禘嚳而郊冥祖契而宗湯周人禘
嚳而郊稷祖文王而宗武王鄭玄曰禘郊祖宗皆配食

也祭昊天園丘曰禘祭上帝南郊曰郊祭五帝五神明
堂曰祖宗此為最詳虞夏退顓頊郊饗殷捨契郊冥去
取違舛唯周得禮之序至明堂始兩配焉文王上配五
帝武王下配五神別父子也經曰嚴父莫太於配天又
曰宗祀文王於明堂以配上帝不言嚴武王以配天則
武王雖在明堂未齊於配雖同祭而終為一主也緯曰
后稷為天地主文王為五帝宗若一神而兩祭之則薦
獻數瀆此神無二主也貞觀永徽禮實專配由顯慶後

始兼尊焉今請以高祖配園丘方澤太宗配南北郊高
宗配五天帝鳳閣舍人元萬頃范履冰等議今禮昊天
上帝等五祀咸奉高祖太宗兼配以申孝也詩昊天章
二后受之易薦上帝配祖考有兼配義高祖太宗既先
配五祀當如舊請奉高宗歷配焉自是郊丘三帝並配
云

文獻通考馬氏曰並配之制始於唐自鄭康成有六
天之說魏晉以來多遵用之以為曜魄寶亦天也感

生帝亦天也均之為天則配天之祖其尊一也至唐人始以為曜魄寶五帝皆星象之屬當從祀南郊而不當以事天之禮事之善矣然感帝之祠既罷旋復雖復其祠而以為有天帝之分尊卑之別遂於郊與明堂所配之祖不無厚薄之疑乃至每祭並配而後得為嚴父之禮然則周公亦豈厚於后稷而薄於文王乎則曷若一遵初議若郊若明堂皆專祀昊天各以一祖配之於禮意人情為兩得乎

通典永昌元年九月勅天無二稱帝是通名承前諸儒
互生同異乃以五方之帝亦謂為天假有經傳互文終
是名實未當稱號不別尊卑相渾自今郊祀之禮唯昊
天上帝稱天自餘五帝皆稱帝

舊唐書則天皇后本紀證聖元年九月親祀南郊加尊
號改元天冊萬歲

禮儀志則天革命天冊萬歲元年加號為天冊金輪大
聖皇帝親享南郊合祭天地以武氏始祖周文王追尊

為始祖文皇帝后父應國公為無上孝明高皇帝以二祖同配如乾封之禮

唐書禮樂志古者祭天于圜丘在國之南祭地于澤中之方丘在國之北所以順陰陽因高下而事天地以其類也其方位既別而其燎壇瘞坎樂舞變數亦皆不同而後世有合祭之文則天天冊萬歲元年親享南郊始合祭天地

舊唐書則天皇后本紀長安二年十一月戊子親享南郊

大赦天下

通典長安二年九月勅祠明堂圜丘神座並令著牀便
為恒式

舊唐書音樂志則天大聖皇后大享昊天樂章十二首

御撰

太陰凝至化貞耀蘊軒儀德邁娥臺敞仁高如幄披
捫天遂啟極夢日乃昇曦

瞻紫極望玄穹翹至懇罄深衷聽雖遠誠必通垂厚

澤降雲宮

乾儀混成冲邃天道下濟高明闔陽晨披紫闕太一
曉降黃庭園壇敢申昭報方璧冀展虔情丹襟式敷
衷懇玄鑒庶察微誠

巍巍廠業廣赫赫聖基隆菲德承先顧禎符萃眇躬
銘開武巖側圖薦洛川中微誠詎幽感景物忽昭融
有懷慙紫極無以謝玄穹

朝壇霧卷曙嶺烟沈爰設筐幣式表誠心筵輝麗壁

樂暢和音仰唯靈鑒俯察翹襟

昭昭上帝穆穆下臨禮崇備物樂奏鏘金蘭羞委薦
桂醕盈斟敢希明德聿罄莊心

罇浮九醞禮備三周陳誠菲奠契福神猷

奠璧郊壇昭大禮鏘金拊石表虔誠始奏承雲娛帝
賞復歌調露暢韶音

荷恩承顧託執契恭臨撫廟略靜邊荒天兵曜神武
有截資先化無為遵舊矩禎符降昊穹大業光寰宇

肅肅祀典邕邕禮秩三獻已周九成斯畢爰撤其俎
載遷其實或昇或降唯誠唯質

禮終肆類樂闋九成仰唯明德敢薦非馨顧慙菲奠
久駐雲輶瞻荷靈澤懔戀兼盈

式乾路關天扉迴日馭動雲衣登金闕入紫微望仙
駕仰恩徽

中宗本紀景龍三年十一月乙丑親祀南郊皇后登壇
亞獻左僕射舒國公韋巨源為終獻

蘇瓌傳將拜南郊國子祭酒祝欽明希庶人旨建議請皇后為亞獻安樂公主為終獻瓌深非其議嘗于御前面折欽明帝雖悟竟從欽明所奏

褚无量傳中宗將親祀南郊詔禮官學士修定儀注國子祭酒祝欽明司業郭山惲皆希旨請以皇后為亞獻无量獨與太常博士唐紹蔣欽緒固爭以為不可无量建議曰夫郊祀者明皇之盛事國家之大禮行其禮者不可以臆斷不可以情求皆上順天心中

符人事欽若稽古率由舊章然後可以交神明可以膺福祐然禮文雖衆莫如周禮周禮者周公致太平之書先聖極由衷之典法天地而行教化辨方位而叙人倫其義可以幽贊神明其文可以經緯邦國備物致用其可忽乎至如冬至圜丘祭中最大皇后內主禮位甚尊若合郊天助祭則當具著禮典今編檢周官無此儀制蓋由祭天南郊不以地配唯以始祖為主不以祖妣配天故唯皇帝親行其禮皇后不合

預也謹案大宗伯職云若王不祭祀則攝位注云王有故代行其祭祀下文云凡大祭祀王后不與則攝而薦豆籩徹若皇后合助祭承此下文即當云若不祭祀則攝而薦豆籩今於文上更起凡則是別生餘事夫事與上異則別起凡凡者生上起下之名不專繫於本職周禮一部之內此例極多備在文中不可具錄又王后助祭親薦豆籩而不徹案九嬪職云凡祭贊后薦徹豆籩注云后進之而不徹則知中徹者

為宗伯生文若宗伯攝祭則宗伯親徹不別使人又
案外宗掌宗廟之祀王后不與則贊宗伯此文與
上相證何以明之案外宗唯掌宗廟祭祀不掌郊天
足明此文是宗廟祭也案王后行事總在內宰職中
檢其職文唯云大祭祀后裸獻則贊瑤爵亦如之鄭
注云謂祭宗廟也注所以知者以文云裸獻祭天無
裸以此得知又祭天之器則用陶匏亦無瑤爵注以
此得知是宗廟也又內司服掌王后六服無祭天之

服而中車職掌王后之五輅亦無后祭天之輅祭天
七獻無后亞獻以此諸文參之故知后不合助祭天
也唯漢書郊祀志則有天地合祭皇后預享之事此
則西漢末代強臣擅朝悖亂彝倫黷神諂祭不經之
典事涉誣神故易傳曰誣神者殃及三代太誓曰正
稽古立功立事可以永年承天之太律斯史策之良
誠豈可不知今南郊禮儀事不稽古忝守經術不敢
默然請旁詢碩儒俯撫舊典採曲臺之故事行圓丘

之正儀使聖朝叶昭曠之塗天下知文物之盛豈不
幸甚時左僕射韋巨源等阿旨叶同欽明之議竟不
從无量所奏

蔣欽緒傳中宗始親郊國子祭酒祝欽明建言皇后
應亞獻欲以媚韋氏天子疑之詔禮官議衆曲意阿
徇欽緒獨抗言不可諸儒壯其節

祝欽明傳入為國子祭酒景龍三年中宗將親祀南
郊欽明與國子司業郭山惲二人奏言皇后亦合助

祭遂建議曰謹案周禮天神曰祀地祇曰祭宗廟曰
享大宗伯職曰祀大神祭大祇享大鬼理其大禮若
王有故不預則攝位凡大祭祀王后不預則設而薦
豆籩徹又追師職掌王后之首服以待祭祀又內司
服職掌王后之六服凡祭祀供后之衣服又九嬪職
大祭祀后裸獻則贊瑤爵亦如之據此諸文即皇后
合助皇帝祀天神祭地祇明矣故鄭玄注內司服云
闕狄皇后助王祭羣小祀之服然則小祀尚助王祭

中大推理可知闕狄之上猶有兩服第一禕衣第二
搖狄第三闕狄此三狄皆助祭之服闕狄即助祭小
祀即知搖狄助祭中祀禕衣助祭大祀鄭舉一隅故
不委說唯祭宗廟周禮王有兩服先王衮冕先公鷩
冕鄭玄因此以后助祭宗廟亦分兩服云禕衣助祭
先王搖狄助祭先公不言助祭天地社稷自宜三隅
而反且周禮正文凡祭王后不預既不專言宗廟即
知兼祀天地故云凡也又春秋外傳云禘郊之事天

子親射其牲王后親舂其粢故代婦職但云詔王后之禮事不主言宗廟也若專主宗廟者則內宗外宗職皆言掌宗廟之祭祀此皆禮文分明不合疑惑舊說以天子父天母地兄日姊月所以祀天于南郊祭地于北郊朝日于東門之外以昭事神訓人事君必躬親以禮文有故然後使攝此其義也禮記祭統曰夫祭也者必夫婦親之所以備內外之官也官備則具備又哀公問於孔子曰冕而親迎不已重乎孔子

愀然作色而對曰合二姓之好以繼先聖之後以為
天地宗廟社稷之主君何謂已重焉又漢書郊祀志
云天地合祭先祖配天先妣配地天地合精夫婦判
合祭天南郊則以地配一體之義也據此諸文即知
皇后合助祭望請別修助祭儀注同進帝頗以為疑
召禮官親問之太常博士唐紹蔣欽緒對曰皇后南
郊助祭於禮不合但欽明所執是祭宗廟禮非祭天
地禮謹案魏晉宋及齊梁周隋等歷代史籍至於郊

天祀地並無皇后助祭之事帝令宰相取兩家狀對
定欽緒與唐紹及太常博士彭景直又奏議曰周禮
凡言祭祀享三者皆祭之互名本無定義何以明之
案周禮典瑞職云兩珪有邸以祀地則祭地亦稱祀
也又司筵云設祀先王之胙席則祭宗廟亦稱祀也
又內宗職云掌宗廟之祭祀此又非獨天稱祀地稱
祭也又案禮記云唯聖為能享帝此即祀天帝亦言
享也又案孝經云春秋祭祀以時思之此即宗廟亦

言祭祀也經典此文不可備數據此則欽明所執天
曰祀地曰祭廟曰享未得為定明矣又周禮凡言大
祭祀者祭天地宗廟之總名不獨天地為大祭也何
以明之案鬱人職云大祭祀與量人授舉筭之卒爵
尸與筭皆宗廟之事則宗廟亦稱大祭祀又欽明狀
引九嬪職大祭祀后裸獻則贊瑤爵據祭天無裸亦
無瑤爵此乃宗廟稱大祭祀之明文欽明所執大祭
祀即為祭天地未得為定明矣又周禮大宗伯職云

凡大祭祀王后有故不預則攝而薦豆籩徹欽明唯
執此文以為王后有祭天地之禮欽緒等據此乃是
王后薦宗廟之禮非祭天地之事何以明之案此文
凡祀大神祭大祇享大鬼帥執事而卜日宿視滌濯
涖玉鬯省牲鑊奉玉盞制大號理其大禮制相王之
大禮若王不與祭祀則攝位此已上一凡直是王兼
祭天地宗廟之事故通言大神大祇大鬼之祭也已
下文云凡大祭祀王后不與則攝而薦豆籩徹此一

凡直是王后祭廟之事故唯言大祭祀也若云王后
助祭天地不應重起凡大祭祀之文也為嫌王后有
祭天地之疑故重起後凡以別之耳王后祭廟自是
大祭祀何故取上凡相王之禮以混下凡王后祭宗
廟之文此是本經科段明白又案周禮外宗掌宗廟
之祭祀佐王后薦玉豆凡后之獻亦如之王后有故
不預則宗伯攝而薦豆籩外宗無佐祭天地之禮但
天地尚質宗廟尚文玉豆宗廟之器初非祭天所設

請問欽明若王后助祭天地在周禮使何人贊佐若
宗伯攝后薦豆祭天又合何人贊佐並請明徵禮文
即知攝薦是宗廟之禮明矣案周禮司服云王祀昊
天上帝則服大裘而冕享先王則衮冕內司服掌王
后祭服無王后祭天之服案三禮義宗明王后六服
謂褱衣搖翟闕翟鞠衣展衣祿衣褱衣從王祭先王
則服之搖翟祭先公及饗諸侯則服之鞠衣以採桑
則服之展衣以禮見王及見賓客則服之祿衣燕居

服之王后無助祭於天地之服但自先王以下又三
禮義宗明三夫人之服云后不助祭天地五岳故無
助天地四望之服案此則王后無祭天之服明矣三
禮義宗明王后五輅謂重翟厭翟安車翟車輦車也
重翟者后從王祭先王先公所乘也厭翟者后從王
饗諸侯所乘也安車者后宮中朝夕見於王所乘也
翟車者后求桑所乘也輦車者后遊宴所乘也案此
則王后無祭天之車明矣又禮記郊特牲義贊云祭

天無祿鄭玄注云唯人道宗廟有祿天地大神至尊
不祿園丘之祭與宗廟不同朝踐王酌泛齊以獻是
一獻后無祭天之事大宗伯次酌醴齊以獻是為二
獻案此則祭園丘大宗伯次王為獻非攝王后之事
欽明等所執王后有故不預則宗伯攝薦豆籩更明
攝王后宗廟之薦非攝天地之祀明矣欽明建議引
禮記祭統曰夫祭也者必夫婦親之案此是王與后
祭宗廟之禮非關祀天地之義案漢魏晉宋後魏齊

梁周陳隋等歷代史籍興王令主郊天祀地代有其
禮史不闕書並不見往代皇后助祭之事又高祖神
堯皇帝太宗文武聖皇帝南郊祀天無皇后助祭處
高宗天皇大帝永徽二年十一月辛酉親有事于南
郊又總章元年十二月丁卯親拜南郊亦並無皇后
助祭處又案大唐禮亦無皇后助祭南郊之禮欽緒
等幸忝禮官親承聖問竭盡聞見不敢依隨伏以主
上稽古志遵舊典所議助祭實無明文時尚書左僕

射韋巨源又希旨協同欽明之議上納其言竟以后
為亞獻仍補大臣李嶠等女為齋娘以執籩豆及禮
畢特詔齋娘有夫壻者咸為改官景雲初侍御史倪
若水劾奏欽明及郭山惲曰欽明等本是腐儒素無
操行崇班列爵實為叨忝而涓塵莫効諂佞為能遂
使曲臺之禮園丘之制百王故事一朝墜失所謂亂
常改作希旨病君人之不才遂至於此今聖朝馭歷
賢良入用唯茲小人猶在朝列臣請並從黜放以肅

周行於是左授欽明饒州刺史

唐書祝欽明傳欽明與國子司業郭山惲陰迎韋后
意謬立議帝雖不睿猶疑之召禮官質問時左僕射
韋巨源助后掎掣帝奪政事即傳欽明議帝果用其
言以皇后為亞獻

通典欽明又請以安樂公主為終獻唐紹蔣欽緒固
爭乃止

蕙田案皇后助祭南郊固非典禮然其端起

于合祭也天地既已同牢夫婦何妨並薦殉
葬之禍由于作俑信然唐紹蔣欽緒奮然爭
之考証確實辨駁明暢洵為快矣然卒不行
邪見之難黜如是欽明諂媚究歸黜放宜哉
舊唐書音樂志景龍三年中宗親祀昊天上帝樂章十
首

降神用豫和 天之歷數歸睿唐顧唯菲德欽昊蒼
選吉日兮表殷薦冀神鑒兮降闔陽

皇帝行用太和

國鐘宮

恭臨寶位肅奉瑤圖恒思解

網每軫泣辜德慙巢燧化劣唐虞期我良弼式旣嘉

謨

告謝

國鐘宮

得一流元澤通三御紫宸遠叶千齡運

遐銷九域塵絕瑞駢闐集殊祥絡繹臻年登慶西畝

稔歲賀盈囷

登歌用肅和

無射均之
林鐘羽

悠哉廣覆大矣曲成九元

著象七曜甄明珪璧是真醞酎斯盈作樂崇德爰暢

咸英

迎俎用雍和

圜鐘均之
黃鐘羽

郊壇展敬嚴配因心孤竹

簫管空桑瑟琴肅穆大禮鏗鏘八音恭惟上帝希降

靈歆

酌獻用福和

圜鐘
宮

九成爰奏三獻式陳欽承景福

恭託明禋

中宮助祭昇壇用

函鐘
宮

坤元光至德柔訓闡皇風

采芣芳聲遠冬蠹斯美化隆獻範超千載嘉猷備六宮

肅恭陪盛典欽若薦禋宗

亞獻用

函鐘宮

三靈降饗三后配神虔敷藻奠敬展

郊禋

送文舞出迎武舞入用舒和

圜鐘均之中呂商

已陳染盛

敷嚴祀更奏笙鏞協雅聲琿圖寶歷欣寧謐宴俗淳

風樂太平

武舞作用凱安

圜鐘均之無射徵

堂堂聖祖興赫赫昌基

泰戎車盟津偃玉帛塗山會舜日啟祥輝堯雲卷征

旆風猷被有截聲教覃無外

通典景雲元年十一月十三日乙丑冬至祀圜丘時陰陽人盧雅侯藝等奏請促冬至就十二日甲子以為吉會右臺侍御史唐紹奏曰禮所以冬至祭圜丘于南郊夏至祭方澤于北郊者以其日行躔次極於南北之際也日北極當晷度循半日南極當晷度環周是日一陽爻生為天地交際之始故易曰復其見天地之心乎即冬至卦象也一歲之內吉莫大焉甲子但為六旬之首

一年之內隔月常遇既非大會晷運未周唯總六甲之辰助四時而成歲今欲避園丘以取甲子是背大吉而就小吉也竟依紹議

蕙田案此郊新舊唐書本紀俱不載馬氏通考亦不數考舊書志即叙景龍三年之下而十二甲子十三乙丑與通典合是則當為杜氏之誤然杜述本朝事何至析一為二姑存之而闕其疑

唐書睿宗本紀先天元年正月辛巳有事于南郊己丑

大赦改元曰太極

舊書作景雲三年

通典太極元年正月初將有事于南郊時有司議唯祭
昊天上帝而不設皇地祇位諫議大夫賈曾上表謹案
禮祭法曰有虞氏禘黃帝而郊嚳大傳曰大祭曰禘然
則郊之與廟俱有禘名禘廟則祖宗之主俱合於太祖
之廟禘郊則地祇羣望俱合於圜丘以始祖配享皆有
事而大祭異於常祀之義三輔故事漢祭圜丘儀上帝


位正南面后土位亦南面而少東又東觀漢記云光武
於洛陽城南為圜壇天地位其上皆南面西上案兩漢
時自有后土及北郊祀而此已於圜丘設地位明是禘
祭之儀今之南郊正當禘禮固宜合配天地咸秩百神
請備設皇地祇并從祀等座則禮得稽古義合緣情時
又將親享北郊竟寢曾表

蕙田案此條新舊唐書詳略懸殊唯通典為
適中故存此去彼

唐書賈曾傳天子親郊有司議不設皇地祇位曾請合享天地如古制并從祀等座睿宗詔宰相禮官議皆如曾請

蕙田案是年正月南郊改元太極五月北郊又改元延和舊書作景雲三年新書又作先天元年一年四號自古無之又案通典言寢曾表是不合祭也新書此傳言如曾請又似改為合祭矣然此年五月戊寅有事北郊

新書禮樂志又云是時睿宗將祭地于北郊
故曾之議寢據此是賈傳誤也



五禮通考卷九

按：本册原書於抗戰播遷中曾遭水漬，致字跡模糊不清，茲雖力經描修版面，仍無法全復舊觀。

欽定四庫全書

經部

五禮通考卷十一

詳校官監察御史_臣范宸

給事中_臣溫常綬覆勘

總校官進士_臣繆琪

校對官中書_臣李棨

謄錄監生_臣王貽桂

欽定四庫全書

五禮通考卷十

刑部尚書秦蕙田撰

吉禮十

圜丘祀天

唐書張九齡傳玄宗即位未郊見九齡建言天百神之
君王者所由受命也自古繼統之主必有郊配蓋敬天
命報所受也不以德澤未洽年穀未登而闕其禮昔者

周公郊祀后稷以配天謂成王幼沖周公居攝猶用其禮明不可廢也漢丞相匡衡曰帝王之事莫重乎郊祀董仲舒亦言不郊而祭山川失祭之序逆於禮故春秋非之臣謂衡仲舒古之知禮皆以郊之祭所宜先也陛下紹休聖緒于今五載而未行大報考之于經義或未通今百穀嘉生鳥獸咸若夷狄內附兵革用弭乃怠于事天恐不可以訓願以迎日之至升紫壇陳采席定天位則聖典無遺矣

蕙田案本文明云紹休聖緒于今五載是非
五年即四年通考作三年或是五字之誤

冊府元龜開元十一年九月癸未制宜以迎日之至允
備郊天之禮所司詳擇舊典以聞

唐書玄宗本紀開元十一年十一月戊寅有事于南郊
大赦

通典開元十一年十一月親享圜丘中書令張說為
禮儀使衛尉少卿韋縉為副說建請以高祖配祭始

罷三祖同配之禮

舊唐書音樂志開元十一年玄宗祀昊天于圜丘樂章

十一首

一恐當作四

降神用豫和

圜鐘宮三成黃鐘角一成太簇徵
一成姑洗羽一成已上六變詞同

至

矣丕構蒸哉太平授犧膺錄復禹繼明草木仁化鳧
鷖頌聲祀宗陳德無媿斯誠

迎神用歆和

崇禋已備粢盛聿修潔誠斯展鐘石

方適

皇祖光皇帝室酌獻用長發

黃鐘宮詞同
貞觀長發

太祖景皇

帝室酌獻用大基

太簇宮詞同
貞觀大基

太祖元皇帝室酌獻

用大成

姑洗宮詞同
貞觀大成

高祖神堯皇帝室酌獻用大明

蕤賓宮詞同
貞觀大明

太祖文武聖皇帝室酌獻用崇德

夷則宮詞

同貞觀
崇德

高宗天皇大帝室酌獻用鈞天

黃鐘宮詞同
光宅鈞天

懿宗孝敬皇帝室酌獻用承和

黃鐘宮

金相載穆王

裕重暉養德清禁承光紫微乾宮候色震象增威監
國方永賓天不歸孝友自衷溫文性與龍樓正啟鶴

駕斯舉丹宸流念鴻名式序中興考室永陳彝俎

皇帝飲福用延和

黃鐘宮

巍巍累聖穆穆重光奄有

區夏祚啟隆唐百蠻飲澤萬國來王本枝億載鼎祚

逾長

皇帝行用大和 郊壇齋帝禮樂祀天丹青寰宇宮

徵山川神祇畢降行止重旋融融穆穆納祉洪延

登歌奠玉用肅和 止奏潛聆登儀宿轉大玉躬奉

參鐘首奠簋簠聿昇犧牲遞薦昭事顯若存存以覩

迎俎入用雍和 爛雲普洽律風無外千品其凝九

賓斯會禋樽晉燭純犧滌汰元覆攸廣鴻休汪濊

皇帝酌獻天神用壽和 六變爰闋八階載虔祐我

皇祚于萬斯年

酌獻配座用壽和 於赫聖祖龍飛晉陽底定萬國

奄有四方功格上下道冠農黃郊天配享德合無疆

飲福酒用壽和 崇崇太時肅肅嚴禋菜盛既潔金

石畢陳上帝來享介福爰臻受釐合福寶祚惟新

送文舞出迎武舞入用舒和 祝史正辭人神慶叶

福以德昭孚以誠接六藝云備百禮斯浹祀事孔明
祚流萬葉

武舞用凱安 馨香惟后德明命光天保肅和崇聖
靈陳信表黃道玉鍼初蹈厲金匏既靜好

禮畢送神用豫和 大號成命思文配天神光盼嚮
龍駕言旋眇眇閭闔昭昭上玄俾昌而大于萬斯年
皇帝還大次用太和 六成既闋三薦云終神心具

醉聖敬愈崇受釐皇邸迴蹕帷宮穰穰之福永永無窮

舊唐書玄宗本紀開元二十年九月乙巳中書令蕭嵩等奏上開元新禮

禮儀志開元二十年蕭嵩為中書令改撰新禮祀天一歲有四冬至祀昊天上帝于圜丘高祖神堯皇帝配中官加為一百五十九座外官減為一百四座其昊天上帝及配帝二座每座籩豆十二簋簋饗俎各一上帝則

太樽著樽犧樽象樽壺樽各二山罍六配帝則不設太樽及壺樽減山罍之四餘同上帝五方帝座則籩豆各十簋簋甄俎各一太樽二大明夜明籩豆各八餘同五方帝內官每座籩豆二簋俎各一內官以上設樽于十二階之間內官每道間著樽二中官犧樽二外官著樽二衆星壺樽二正月上辛祈穀祀昊天上帝于圜丘以高祖配

孟夏雩祀昊天上帝于圜丘以太宗配

季秋大享于明堂祀昊天上帝以睿宗配

案祈穀雩祀明堂見本條

下

蕙田案唐書禮樂志稱蕭嵩等撰定開元禮
雖未能合古而天神之位別矣至二十年蕭
嵩等定禮而祖宗之配定矣豈不信哉自漢
以後千餘年間為註家所惑郊丘天帝配位
乖舛互異至不可究詰即貞觀定禮以後而
乾封之祀感帝垂拱之三帝並祀不旋踵而
襲謬至開元禮成而大典秩如矣後世雖時

有損益然大綱率不外此是古今五禮一大

關鍵也

通典開元禮纂類凡祀昊天上帝及配座用蒼犢各一
五方上帝五人帝各用方色犢一大明青犢一夜明白
犢一若冬至祀圜丘加羊九豕九凡肉皆實俎其牲皆

升右胖體十一

前節三肩臂臑後節二肫脰正脊一脰
脊一橫脊一長脊一短脊一代脊一皆

二骨以並脊從首為正脊旁中為正凡供別祭用太牢
者犢一羊一猪一酒二斗脯一段醢四合若供少牢去
犢減酒一斗郊廟樽壘五齊三酒並見本儀中○凡用
籩豆各十二籩實以石鹽乾魚乾棗栗黃榛子人菱人

芡人鹿脯白餅黑餅糗餌粉飡豆實以韭菹醢醢菁菹鹿醢芹菹兔醢笋菹魚醢胛析菹豚拍飴食糝食用

簋簋各二簋實黍稷飯簋實稻

梁飯○甄實大羹鉶實肉羹

皇帝冬至祀圜丘儀

正月上辛祈穀孟夏雩祀及攝事並附

卜日于太廟南門之外

將卜前一日以右校掃除太廟南門之外守宮設太常卿以下次于門外之東皆西向其日平明太卜令卜正占者俱就次各服公服守宮布卜席于闕西闕外西向謁者告事具謁者引太常卿升立于門東西面贊引引

太卜令卜正占者門西東面卜正先抱龜奠于席上西
首灼龜之具奠于龜北執龜立于席東北面太卜令進
受龜詣太常卿前示高太常卿受視訖太卜令受龜少
退俟太常卿曰皇帝來日某祗祀于某尚饗太卜令曰
諾遂述命還即席西面坐命龜曰假爾太龜有常興授
卜正龜負東扉卜正坐作龜訖興太卜令進受龜示太
常卿卿受視反之太卜令退復位東面與衆占之訖不
釋龜進告于太常卿占曰某日從授卜正龜謁者進太

常卿之左白禮畢謁者引太常卿以下還次卜者徹龜
守宮徹席以進若上旬不吉卜中旬中旬不吉卜下旬
皆如初禮若卜吉日及非大事皆太卜令蒞卜卜正占
者視高命龜作龜

齋戒

前祀七日皇帝散齋四日于別殿致齋三日其二日于
太極殿一日于行宮前致齋一日尚舍奉御設御幄于
太極殿西序及室內俱東向尚舍直長張帷于前楹下

致齋之日質明諸衛勒所部屯門列仗晝漏上水一刻
侍中板奏請中嚴諸衛之屬各督其隊入陳于殿庭如
常儀通事舍人引文武五品以上袴褶陪位如式諸侍
衛之官各服其器服諸侍臣並結珮

凡齋者則結珮

俱詣閣奉

迎上水二刻侍中板奏外辦上水三刻皇帝服袞冕

上辛

服通天冠絳紗袍

結珮乘輿出自西房曲直華蓋警蹕侍衛如

常儀皇帝即御座東向坐侍臣夾侍如常一刻頃侍中
前跪奏稱侍中臣某言請降就齋室俛伏興還侍位皇

帝降座入室文武侍臣各還本司直衛者如常通事舍

人分引陪位者以次出凡應祀之官散齋四日致齋三

日散齋皆于正寢致齋二日于本司一日于祀所其無本司者皆于祀所焉近侍之官應從

升者及從祀羣官諸方客使各于本司館清齋一宿

無本

司各于家正寢諸祀官致齋之日給酒食及明衣布各習禮于

齋所攝事無皇帝齋儀上辛雩祠同光祿卿監取明水火

太官令取水于陰鑑取火

于陽燧火以供釁水以實罇焉前祀二日太尉告高祖神堯皇帝廟如

常告之儀告以配神作主雩祀侑孟夏告太宗文武皇帝廟前祀一日諸衛令

其屬未後一刻各以其器服守墳

每門二人
每隅一人

與大樂工

人俱清齋一宿焉

凡大祀齋官皆前七日集尚書省太尉誓曰某月日

祀昊天上帝于圜丘

其誓各隨祭
享祀事言之

各揚其職不供其

事國有常刑

散齋理事如舊夜宿止于家正寢唯

不弔喪問疾不作樂不判署刑殺文書不行刑罰不

經穢惡致齋唯祀事得行其餘悉斷

凡大祀之官散
齋四日中祀三

日小祀二日致齋大祀三日中祀二日小祀一日其
致齋日三公于都省安置所司鋪設其餘官皇城內

有本司者于本司無者于太常社郊太廟齋坊安置
皆日未出前到齋所至祠前一日各從齋所晝漏上
水三刻向祀所仍令平明清所行之路道次不得見
諸凶穢衰經經過訖任行其哭泣之聲聞于祭所者
權斷訖事非應散齋者惟清齋一宿于本司及祀所
凡大祀中祀接神齋官祀前一日皆沐浴九品以上
皆官給明衣齋郎升壇行事亦權給潔服應齋官所
習禮臨時闕者通攝行事致齋之日先不食公糧及
無本司者大官准品給食祈告一日清齋者設食亦
如之凡散齋有大功已上喪致齋有周已上喪並聽
赴即居總麻已上喪者不得行宗廟之祭其在
齋坊病者聽還死于齋所同房不得行事也

陳設

前祀三日尚舍直長施大次于外壝東門之內道北南

面

攝事守官設祀官公卿等次于東壇之外道南北向西上焉

尚舍奉御座衛尉設

文武侍臣次

上辛雩祀守官設文武侍臣次焉

于大次之前文官在左

武官在右俱相向

上辛雩祀于大次之後俱南向

設諸祀官次于東壇

之外道南從祀文官九品以上于祀官之東東方南方

朝集使于文官之東東方南方蕃客又于其東俱重行

每等異位北向西上介公鄒公于西壇之外道南武官

九品以上于介公鄒公之西西方北方朝集使于武官之

西西方北方蕃客又于其西俱重行每等異位北向東

上其褒聖侯若在朝位于文官三品之下攝事無大次褒聖等儀上辛雩祀同設陳饌幔于

內壝東門西門之外道北南向北門之外道東西向壇上

及東方南方午陛之東饌陳于東門外西方及南方午陛之西饌陳于西門外北方之饌陳于北門外上辛雩祀但有壝東方之外饌焉前祀二日大樂令設宮懸之樂于壇南內

壝之外東方西方磬簾起北鐘簾次之南方北方磬簾起西鐘簾次之設十二鋪鐘于編懸之間各依辰位樹

雷鼓于北懸之內道之左右植建鼓于四隅置祝敔于

懸內

祝在左敔在右

設歌鐘歌磬于壇上近南北向磬簾在西

鐘簾在東其匏竹者立于壇下重行北向相對為首

凡懸

皆展而編之

諸工人各位于懸後東方西方以北為上南方

北方以西為上右校掃除壇之内外郊社令積柴于燎

壇

其壇于神壇之景地内壝之外

方一丈高丈二尺開上南出户方六

尺前祀一日奉禮設御位于壇之東南西向設望燎位

于柴壇之北南向設祀官公卿位于内壝東門之外

上辛

雩祀則東門内攝事亦然

道南分獻之官于公卿之南

上辛雩祀無分獻位以下

皆執事者位于其後每等異位俱重行西向北上設御

史位于壇下一位于東南西向一位于西南東向設奉
禮位于樂懸東北贊者二人在南差退俱西向又設奉
禮贊者位于燎壇東北西向皆北上設協律郎位于壇
上南陛之西東向設太樂令位于北懸之間當壇北向
設從祀文官九品以上位于執事之南東方南方朝集
使于文官之南東方南方蕃客又于其南俱每等異位
重行西向北上介公鄒公位于中壇上辛零
祀內壇西門之內
道南武官九品以上位于介公鄒公之南西方北方朝

集使于武官之南西方北方蕃客又于其南俱每等異

位重行東向北上

其褒聖侯于文官三品之下諸州使人各分方位于朝集使之後攝事無

褒聖已上至從祀位

又設祀官及從祀羣官等門外位于東西墻

門之外如設次之式設牲牐于東墻之外當門西向蒼

牲一又青牲一在北少退南上次赤牲一黃牲一白牲

一元牲一

雩祀五方色牲各二

又赤牲一白牲一

上辛雩祀無日月牲

在南

皆少退以北為上又設廩犧令位于牲西南史陪其後

俱北面設諸太祝位于牲東各當牲後祝史陪其後俱

西向設太常卿省牲位于牲前近北又設御史位于太常卿之西俱南向設酒罇之位上帝太罇二犧罇二山壘二在壇上東南隅北向象罇二壺罇二山壘四在壇下南陛之東北向俱西上設配帝著罇二犧罇二象罇二山壘二在壇上于上帝酒罇之東北向西上五帝日月各太罇二在第一等

上辛則五帝各太罇一著罇二犧罇二壘二在第一等神座之

左而右向無日月以下諸座攝事亦然也

內官每陛間各象罇二在第二等

中官每陛間各壺罇二在第三等外官每階間各概罇

二在壇下衆星每道間各散罇二于內壝之外凡罇各

設于神座之左而右向

罇皆加勺罍五帝日月以上皆有坩以置爵霽祀無日月以下

罇其五帝太罇犧罇各二壘一在第一等五人帝犧罇各二在第二等五官象罇各二在壇下設御洗

于午陞東南亞獻終獻同洗于卯陞之南俱北向

攝儀但設

洗午陞東南北面霽祀設亞獻之洗于御東南五官洗于罇

設分獻壘洗壘水在洗

東籬在洗西南肆

籬實以巾爵

籬幕各于其方陞道之左俱

內向執罇壘籬幕者各于罇壘籬幕之後設玉幣之籬

于壇上下罇坩之所祀前一日晡後

上辛霽祀皆祀日未明五刻焉太

史令郊社令各常服帥其屬并設昊天上帝神座于壇

上北方南向席以藁秸設高祖神堯皇帝神座

雩祀則設太宗

文武聖皇帝神座焉

于東方西向席以莞設五方帝日月神座于

壇第一等青帝于東陞之北赤帝于南陞之東黃帝于

南陞之西白帝于西陞之南黑帝于北陞之西

雩祀又設五人

帝座于第二等如五方之陞位又設五官座于壇下東南西向北上無日月以下諸星位

大明于東

陞之南

上辛並無大明以下位矣

夜明于西陞之北席皆以藁秸又

設五星十二辰河漢及內官五十五座于第二等十有

二陛之間各依方面凡座皆內向其內官有北辰座于東陛之北曜魄寶于北陛之西北斗于南陛之東天一太一皆在北斗之東五帝內座于曜魄寶之東並差在行位前又設二十八宿及中官百五十九座于第三等其二十八宿及帝座七公日星帝座大角攝提太微太子明堂軒轅三台五車諸王月星織女建星天紀等十七座並差在行位前又設外官百五座于內壝之內又設衆星三百六十座于內壝之外各依方次十有二道

之間席皆以莞設神位各于座首所司陳異寶及嘉瑞

等于樂懸之北東西廂

昊天上帝及配帝五方帝五星日月之座設訖却收至祀日未

明五刻郊社令太史令各服其服升壇重設之其內官中官外官衆星等諸座一設定不收也

省牲器

省牲之日午後十刻去壇二百步所

享明堂則于明堂所廟享則于廟所

皆二百步所焉

諸衛之屬禁斷行人

廟享則太令整拂神幄焉

晡後二刻郊

社令丞帥府史三人諸儀二人

享廟則太廟令帥府史也

及齋郎以

罇坩篚冪入設于位

廟享則籩豆簋鉶皆設位加以巾蓋諸器物皆濯而陳之升壇者各

由其陞升廟堂者升自東陞焉

晡後三刻謁者贊引各引祀官公卿以

下俱就東壇門外位

廟享則無壇外公卿位焉

諸太祝與廩犧令以

牲就勝位謁者引司空

諸儀並引太常卿也

贊引引御史入詣壇

東陞升行掃除于上降行樂懸于下訖出還本位初司

空將升又謁者引太常卿贊引引御史入詣壇東陞升

視滌濯

于視濯執罇者皆舉冪告潔廟享升東階

訖引降就省牲位南向立

廩犧令少前曰請省牲退復位太常卿省牲廩犧令又

前舉手曰臚還本位諸太祝各循牲一币四向

疑當作西向

舉手曰充俱還本位諸太祝與廩犧令以次牽牲詣厨

授太官謁者引光祿卿詣厨省鼎鑊申視濯漑謁者贊

引各引祝官御史

廟享但引御史

省眎饌具俱還齋所

享廟則進饌者

入徹籩豆簋簠鉶甄以出而已

祀日未明五刻大官令率宰人以鸞刀

割牲祝史以豆取毛血各置于饌所遂烹牲

廟享毛血每座共實

一豆祝史洗肝于鬱鬯又取脾膋每座各實一豆俱置饌所脾膋腸間脂也

鑾駕出宮

前出宮三日本司宣攝内外各供其職尚舍設行宮于

壇東南向隨地之宜守宮設從祀官五品以上次于承

天門外東西朝堂如常儀前二日太樂令設宮懸之樂

于殿庭如常儀

駕出懸而不作

其日晝漏上水五刻鑾駕發引

發引前七刻槌一鼓為一嚴

三嚴時節前一侍中奏開日侍中奏裁也

侍中奏開

宮殿門及城門未明五刻槌二鼓為再嚴侍中版奏請

中嚴奉禮郎設從祀羣官五品以上位文官于東朝堂

之前西向武官于西朝堂之前東向俱重行北上從祀

羣官五品以上依時刻俱集朝堂次各服其服

其六品以下及

介公鄒公褒聖侯朝集使諸方所司陳大駕國簿于朝
客使等並駕出之日便赴祀所

堂發前二刻搥三鼓為三嚴諸衛之屬各督其隊與鈇

戟以次入陳于殿庭通事舍人引從祀羣官各就朝堂

前位諸侍衛之官各服其器服侍中中書令已下俱詣

西階奉迎

侍中負寶如式

乘黃令進玉輅于太極殿西階之前

南向千牛將軍一人執長刀立于輅前北向黃門侍郎

一人在侍臣之前贊者二人在黃門之前侍中版奏外

辦太僕卿攝衣而升正立執轡皇帝服袞冕

上辛服通天冠絳紗

袍也

乘輿以出降自西階稱警蹕如常千牛將軍執轡皇

帝升輅太僕卿立授綬侍中中書令已下夾侍如常黃

門侍郎進當鑾駕前跪奏稱黃門侍郎臣某言請鑾駕

進發俛伏興退還位

凡黃門侍郎奏請皆進鑾駕前跪奏稱其官臣某言訖俛伏興鑾

駕動又稱警蹕黃門侍郎與贊者夾引以出千牛將軍

夾路而趨駕出承天門至侍臣上馬所黃門侍郎退稱

侍臣上馬贊者承傳文武侍臣皆上馬諸侍衛之官各

督其屬左右翊駕在黃麾內符寶郎奉六寶與殿中監

後部從在黃鉞內侍中中書令已下夾侍于輅前贊者在供奉官人內侍臣上馬畢黃門侍郎奏稱請勅車右升侍中前承制退稱制曰可黃門侍郎退復位千牛將軍升訖黃門侍郎奏稱請鑾駕進發退復位鑾駕動稱警蹕鼓傳音如常不鳴鼓吹不得諠譁其從祀之官在玄武隊後如常儀駕將至諸祀官俱朝服結佩謁者引立于次前重行北向西上駕至行宮南門外迴輅南向將軍降立于輅右侍中進當鑾駕前跪奏稱侍中臣某

言請降輅俛伏興還侍位皇帝降輅乘輦入行宮繖扇
華蓋侍衛警蹕如常儀宿衛如式謁者贊引各引祀官
通事舍人分引文武羣官集行宮朝堂文左武右舍人
承旨勅羣官等各還次

奠玉帛

祀日未明三刻諸祀官及從祀之官各服其服郊社令

良醢令各帥其屬入實罇罍玉幣

凡六罇之次太罇為上實以泛齊著罇次

之實以醴齊犧罇次之實以盎齊象罇次之實以醢齊
壺罇次之實以沈齊山罍為下實以清酒配帝著罇為

上實以汎齊犧罇次之實以醴齊象罇次之實以盎齊
山罍為下實以清酒五帝日月俱以太罇實以汎齊其
內官之象罇實以醴齊中官之壺罇實以汎齊外官之
概罇實以清酒衆星之散罇實以昔酒齊皆加明水酒
皆加玄酒各實于上罇玉上帝以蒼璧青帝以青珪赤
帝以赤璋白帝以駒虞黑帝以玄璜黃帝以黃琮日月
以珪璧昊天上帝及配帝之幣以蒼天帝日月內官以
下各從方色各長丈八尺上辛則五方帝各太罇為上
實以汎齊著罇次之實以醴齊犧罇次之實以盎齊其
用玉昊天上帝以四珪有邸餘同無日月以下罇零祀
同圜丘又有五人帝之幣亦放其方也 太祝以玉幣置于籩太官令帥進

饌者實諸籩豆簠簋等各設于饌幔內未明二刻奉禮
帥贊者先入就位贊引引御史博士諸太祝及令史與

執罇壘籩罍者入自東壝門當壇南重行北面上

凡引導者

每曲一逡巡也

立定奉禮曰再拜贊者承傳

凡奉禮有詞贊者皆承傳

御史

以下皆再拜訖執罇壘籩罍者各就位贊引引御史諸

太祝詣壇東陞御史一人太祝二人升行掃除于上及

第一等御史一人太祝七人升行掃除于下

上辛雩祀贊引引御

史諸太祝掃除于上令史祝史掃除于下

訖各引就位未明一刻謁者贊引

各引祀官及從祀羣官客使等俱就門外位

攝儀無從祀羣官客

使上辛雩祀同

太樂令帥工人二舞次入就位文舞入陳于懸

內武舞立于懸南道西

其升壇者皆脫履于下降納如常焉

謁者引司空

入就位立定奉禮曰再拜司空再拜訖謁者引司空詣

壇東陞升行掃除于上降行樂懸于下訖引復位謁者

贊者各引祀官及從祀羣官客使等次入就位初未明

三刻諸衛列大駕仗衛陳設如式侍中版奏請中嚴乘

黃令進玉輅于行宮南門外迴輅南向

若行宮去壇稍遠嚴警如式焉

未明一刻侍中版奏外辦皇帝服袞冕乘輿以出繖扇

華蓋侍衛如常儀

侍中負寶陪從如式

皇帝升輅如初黃門侍郎

奏請鑾駕進發還侍立鑾駕動稱警蹕如常千牛將軍

夾路而趨

若行宮去壇稍遠奏升輅如式

駕至大次門外迴輅南向

若將

軍升輅即降立于輅右焉

侍中進當鑾駕前奏稱侍中臣某言請降

輅俛伏興還侍立皇帝降輅乘輿之大次繖扇華蓋侍

衛如常儀郊社令以祝版進御署訖近臣奉出郊社令

各受奠于坫皇帝傳大次半刻頃通事舍人各引從祀

文武羣官介公儔公諸方客使皆先入就位太常博士

引太常卿立于大次門外當門北向侍中版奏外辦質

明皇帝改服大裘而冕

上辛雩祀蓋服裘冕

出次華蓋侍衛如常

儀

侍中負寶陪從如式

博士引太常卿太常引皇帝

凡太常卿前導皆博士先

引焉

至中壝門外

上辛雩祀內壝

殿中監進大珪尚衣奉御又以

鎮圭授殿中監殿中監授進皇帝搢大珪執鎮圭華蓋

仗衛停于門外禮部尚書與近侍者陪從如常儀

大珪如搢

不便請立定近侍承奉焉

皇帝至版位西向立

每立定太常卿與博士退立于左

太

常卿前奏稱請再拜退復位皇帝再拜

攝事無未明三刻下至此再拜

儀上辛雩祀同

奉禮曰衆官再拜衆官在位者皆再拜

其先拜者不拜

太常卿前奏

攝則謁者進太尉之
左白上辛零祀同焉

有司謹具請行事退

復位協律郎跪俛伏舉麾

凡取物者皆跪俛伏而取以
興奠物則跪奠訖俛伏而後

興他
放此鼓柷奏元

國諱
改焉

和之樂乃以圜鐘為宮黃鐘為角

太簇為徵姑洗為羽作文武之舞樂舞六成

圜鐘三奏
黃鐘太簇

姑洗各
一奏也

偃麾戛敔樂止

凡樂皆協律郎舉麾工鼓柷
而後作偃麾戛敔而後止焉

太

常卿前奏稱再拜退復位皇帝再拜

攝事無太常卿至
皇帝拜上辛零祀

也同奉禮曰衆官再拜衆官在位者皆再拜正座配座太

祝跪取玉幣于篚各立于罇所諸太祝俱取玉及幣亦

各立于樽所太常卿引皇帝太和之樂作

皇帝每行皆作太和之樂

攝則謁者引太尉已下皆謁者引太尉太和樂上辛雩祀同

皇帝詣壇升自南陛侍

中中書令以下及左右侍衛量人從升

以下皆如之

皇帝升

壇北向立

攝則太尉升南陛北向立

樂止正座太祝加玉于幣以授

侍中侍中奉玉幣東向進皇帝搢鎮珪受玉幣

凡受物皆搢鎮

珪跪奠訖執珪俛伏興太尉則搢笏

登歌作肅和之樂以大呂之均太常

卿引皇帝進北向跪奠于昊天上帝神座俛伏興太常

卿引皇帝立于西方東向配座太祝以幣授侍中侍中

奉幣北向進

攝則太祝授太尉太尉奉玉幣進奠

皇帝受幣太常卿引進

高祖神堯皇帝神座

雩祀則太常卿

俛伏興太常卿引皇帝少

退東向再拜訖登歌止太常卿引皇帝樂作皇帝降自

南陛還版位西向立樂止

攝則太尉行還立無樂也

初皇帝將奠配

帝之幣謁者七人各分引獻官奉玉幣俱進跪奠于第

一等神座

上辛則謁者五人各分引獻官奉玉幣奠五方帝座攝事同雩祀五人帝五官相次而畢

餘星座之幣謁者贊引各引獻官進奠于首座餘皆祝

史齋郎助奠訖引還復位

攝則太尉奠配座諸太祝及諸獻官各奉玉幣進于神座

訖還樽所上辛無星以下座也初衆官拜訖祝史各奉毛血之豆立于

門外登歌止祝史奉毛血入各由其陞升諸太祝迎取于壇上俱進奠于神座諸太祝與祝史退立于樽所

進熟

皇帝既升

攝則太尉升上辛零祀同

奠玉幣太官令出帥進饌者奉

饌各陳于壝門外謁者引司徒出詣饌所司徒奉昊天

上帝之俎初皇帝既至位樂止太官令引饌入

攝事則于太祝

奠毛血其太官引饌初入上辛零祀同俎初入門奏雍和之樂以黃鍾之均

自後接神之樂皆奏黃鍾

饌各至其陞樂止祝史俱進徹毛血之豆

降自東陞以出

上帝之饌升自午陞配帝之饌升自卯陞青帝之饌升自寅陞赤帝之饌升自

已陞黃帝之饌升自未陞白帝之饌升自酉陞黑帝之饌升自子陞大明之饌升自辰陞夜明之饌升自戌陞

其內官中官諸饌各隨便而升上辛無大明以下饌攝事同雩祀五人帝饌各由其陞升諸太祝迎

引于壇上各設于神座前

籩豆蓋罍先徹乃升籩簋既奠却其蓋于下也

設訖

謁者引司徒太官令卧進饌者俱降自東陞以出司徒

復位諸太祝各還罇所又進設外官衆星之饌相次而

畢

上辛無外官以下饌雩祀又進設五官饌並無衆星饌也

初壇上設饌訖太常卿

引皇帝詣罍洗

攝則謁者引太尉詣罍洗上辛雩祀同也

樂作皇帝至罍洗

樂止侍中跪取匱興沃水又侍中跪取盤盥承水皇帝

盥手黃門侍郎跪取巾于篚興進皇帝悅手訖黃門侍

郎受巾跪奠于篚黃門侍郎又取匏爵于篚興進皇帝

受爵侍中酌罍水又侍中奉盤皇帝洗爵黃門侍郎又

授巾皆如初皇帝拭爵訖侍中奠盤匱黃門侍郎受巾

奠于篚皆如常太常卿引皇帝樂作皇帝詣壇升自南

陛訖樂止

攝則太尉洗拭匏爵無樂作以下儀

謁者引司徒升自東陛立

于罇所齋郎奉俎從其後太常卿引皇帝詣上帝罇所

執罇者舉冪侍中贊酌汎齊訖壽和之樂作

皇帝每酌獻及飲福

皆作壽和之樂攝則謁者引太尉升自南陛詣上帝罇所執事者舉冪太尉酌汎齊訖樂作

太常卿

引皇帝進昊天上帝神座前北向跪奠爵興太常卿引

皇帝少退北向立樂止

攝儀皆謁者引太尉

太祝持版進于神座

之右東向跪讀祝文維某年歲次月朔日子嗣天子臣

某敢昭告于昊天上帝

攝則云天子某謹遣太尉封某臣名敢昭告于昊天上帝上辛

同 禋祀 大明南至長畧初升萬物權輿六氣資始式遵彝

典慎修禮物

上辛云維神化育羣生財成庶品雲雨作施普博無私爰因啟蟄式遵農事雩祀云

爰茲孟夏龍見紀辰方資長育式遵常禮敬以玉帛犧牲粢盛庶品恭致燔祀表其寅肅

敬以玉帛

犧齊粢盛庶品備茲禋燎祇薦潔誠高祖神堯皇帝配

神作主

凡攝事祀版應御署訖皇帝北向再拜侍臣奉版郊社令受遂奉出

皇帝再拜

攝則

太尉再拜

初讀祝文訖樂作太祝進跪奠版于神座興還罇

所皇帝拜訖樂止太常卿引皇帝詣配帝酒罇所執罇

者舉罇侍中取爵于坵進皇帝受爵侍中贊酌汎齊訖

樂作太常卿引皇帝進高祖神堯皇帝神座

雩祀太宗

東向

跪奠爵俛伏興太常卿引皇帝少退東向立樂止

上辛又謁

者五人各引五方上帝太祝皆取爵于坌酌汎齊各進奠于神座訖還樽所霄祀同太祝持版進

于神座之左北向跪讀祝文曰維某年歲次月朔日子

孝曾孫開元神武皇帝臣某

攝則云皇帝臣某謹遣太尉封臣某

敢昭告

于高祖神堯皇帝履長伊始肅事郊禋用致燔祀于昊

天上帝伏惟慶流長發德冠思文對越昭升永言配命

上辛云時惟孟春敬祈嘉穀用致禋祀昊天上帝伏惟高祖睿哲徇齊欽明昭格祭祀之禮肅奉舊章雲祀云

時惟正陽式遵恒典伏惟道叶乾元德施品物永言配命對越昭升謹以致幣犧齊粢盛

庶品式陳明薦侑神作主尚饗訖興皇帝再拜初讀祝
文訖樂作太祝進跪奠版于神座興還罇所皇帝再拜
訖樂止太常卿引皇帝進昊天上帝神座前北向立樂
作太祝各以爵酌上罇福酒合置一爵太祝持爵授侍
中侍中受爵西向進皇帝再拜受爵跪祭酒啐酒奠爵
俛伏興太祝各率齋郎進俎太祝減神前胙肉皆取前脚第二
胙也加于俎以胙肉共置一俎上太祝持俎以授司徒司
徒奉俎西向進

攝則言授

皇帝受以授左右

攝則太尉以授齋郎

謁者

引司徒降復位皇帝跪取爵遂飲卒爵侍中進受爵以授太祝太祝受爵復于圜皇帝俛伏興再拜樂止太常卿引皇帝樂作皇帝降自南階還版位西向立樂止文舞退鼓祝作舒和之樂退訖戛敔樂止武舞入鼓祝作舒和之樂立定戛敔樂止

自此已上凡攝皆太尉為初獻其儀依皇帝行事贊佐皆

謁者太祝齊郎

皇帝將復位謁者引太尉

攝則太常卿為亞獻自下並改太尉為太

常卿詣壘洗盥手洗拭匏爵訖謁者引太尉自階升壇詣

昊天上帝著罇所執罇者舉罇太尉酌醴齊訖武舞作

謁者引太尉進昊天上帝神座前北向跪奠爵興謁者

引太尉少退北向拜訖謁者引太尉詣配帝犧罇所取

爵于坫執罇者舉罇太尉酌醴齊訖謁者引太尉進高

祖神堯皇帝座前

雩祀
太宗

東向跪奠爵興謁者引太尉少

退東向再拜

上辛五方祝各取爵酌醴
齊供尊訖還罇所雩祀同

訖謁者引太尉

進昊天上帝神座前北向立諸太祝各以爵酌壘福酒

合置一爵太祝持爵進太尉之右西向立太尉再拜受

爵跪祭酒遂飲卒爵太祝進受虛爵復于坫太尉興再

拜訖謁者引太尉却復位初太尉獻將畢謁者引光祿

卿

攝則同以光祿卿為終獻

詣罍洗盥手洗拭匏爵升酌盞齊獻正

座配座

雩祀并獻五方帝也

終獻如亞獻之儀

上辛五帝祀亦各配獻之

訖謁

者引光祿卿降復位初太尉將升獻

攝則太常卿將升獻

謁者七

人分引五方帝及大明夜明等獻官詣罍洗盥手洗拭

匏爵訖各由其陞升

雩祀太尉將升獻贊引引五帝獻官酌醴齊奠太昊氏餘座齊郎助

奠五帝將畢五官獻官酌醴齊奠勾芒氏餘座祝史助奠

詣第一等俱酌汎齊訖各

進跪奠于神座前興各還引降還本位初第一等獻官

將升謁者五人次引獻官各詣壘洗訖引各由其陞升

壇詣第二等內官酒罇所俱酌醢齊各進跪奠爵于內

官座首興餘座皆祝史齋郎助奠相次而畢謁者各引

獻官還本位初第二等獻官將升謁者四人次引獻官

俱詣壘洗盥手各由其陞升壇詣第三等中官酒罇所

俱酌清酒沈齋

攝儀
盥齋

以獻贊引四人次引獻官詣壘洗

盥洗訖詣外官酒罇所俱酌清酒

攝儀
醢齊

以獻贊引四人

次引獻官詣壘洗盥洗訖詣衆星酒罇所酌昔酒

攝儀
沈齋

以獻其祝史齋郎酌酒助奠皆如內官之儀訖謁者贊

引各引獻官還本位

上辛雩祀無日月以下獻儀也

諸獻俱畢武舞止

上下諸祝各進跪徹豆興還罇所

徹者籩豆各一少移于故處也

奉禮

曰賜胙贊者唱衆官再拜衆官在位者皆再拜

已飲福者不拜

元和之樂作太常卿前奏稱請再拜退復位皇帝再拜

樂作一成止

攝事則奉禮曰衆官再拜衆官在位者皆再拜

太常卿前奏請就

望燎位

攝則謁者進太尉之左曰請就望燎位也

太常卿引皇帝樂作皇帝

就望燎位南向立樂止

攝則謁者引太尉也

于羣官將拜上下諸

祝各執篚進神座前取玉幣祝版日月已上齋郎以俎

載牲體黍稷飯及爵酒各由其陞降壇南行經柴壇西

過壇東行自南陞登柴壇以玉幣祝版饌物置于柴上

戶內諸祝史又以内官已下之禮幣皆從燎

上辛無日月已下牲

幣雩祀有五帝幣

奉禮曰可燎東西面各六人以炬燎火半柴

太常卿前奏禮畢

攝則謁者前曰禮畢則太尉出

太常卿引皇帝還大

次樂作皇帝出中壝門

上辛雩祀並內壝

殿中監前受鎮珪以

授尚衣奉御殿中監又前受大珪華蓋侍衛如常儀皇

帝入次樂止謁者贊引各引祀官通事舍人分引從祀
羣官諸方客使以次出贊引引御史太祝已下俱復執
事位立定奉禮曰再拜御史以下皆再拜贊引引出工
人二舞以次出

鑾駕還宮

上辛雩
祀並同

皇帝既還大次侍中版奏請解嚴

將士不得
輒離部位

皇帝停大

次一刻頃槌一鼓為一嚴轉仗衛于還塗如來儀三刻
頃槌二鼓為再嚴將士布隊仗侍中版奏請中嚴皇帝

服通天冠絳紗袍諸祀官服朝服

乘馬者服袴褶

五刻頃槌三

鼓為三嚴通事舍人分引羣官客使等序立于大次之前近南文武侍臣詣大次奉迎乘黃令進金輅于大次門外南向千牛將軍立于輅左侍中版奏外辦太僕卿升執轡皇帝乘輿出次繖扇侍衛警蹕如常儀皇帝升輅太僕卿立授綏黃門侍郎奏稱請鑾駕進發退復位鑾駕動稱警蹕如常儀黃門侍郎贊者夾引千牛將軍夾輅而趨至侍臣上馬所黃門侍郎奏稱請鑾駕權停

勅侍臣上馬侍中前承制退稱制曰可黃門侍郎退稱
侍臣上馬贊者承傳文武侍臣皆上馬畢黃門侍郎奏
稱請勅車右升侍中前承制退稱制曰可黃門侍郎退
復位千牛將軍升訖黃門侍郎奏稱請鑾駕進發退復
位鼓傳音鑾駕動鼓吹振作而還文武羣臣道從如來
儀諸方客使便還館駕至承天門外侍臣下馬所鑾駕
權停文武侍臣皆下馬千牛將軍降立于輅右訖鑾駕
動千牛將軍夾輅而趨駕入嘉德門太樂令令撞蕤賓

之鐘左右鐘皆應鼓柷奏采茨之樂至太極門夏啟樂止入太極門鼓柷奏太和之樂駕至橫街北當東上閣迴輅南向侍中進鑾駕前跪奏稱侍中臣某言請降輅俛伏興還侍位皇帝降輅乘輿以入繖扇侍衛警蹕如常儀侍臣從至閣夏啟樂止初文武羣官至承天門外通事舍人承旨勅羣官並還皇帝既入侍中版奏請解嚴扣鈺將士各還其所

舊唐書玄宗紀天寶元年二月丁亥上加尊號辛卯親

享玄元皇帝于新廟甲午親享太廟丙申合祭天地于南郊

大學衍義補丘氏濬曰有事于郊必先告祖以配天享侑之意蓋行祭告之禮非大亨也自唐人有事上帝必先親享玄元皇帝于太清宮親享太廟然後郊祀宋人因之乃先郊三日奉謚冊寶于太廟次日享玉清昭應宮景靈宮宿太廟既享赴青城嗚呼郊祀之禮見于經者自虞書類上帝始而尤詳載于周禮

禮記此則唐虞三代報本反始之大事也未見之先
詣祖廟告祭以配享之故而致齋以致其精明之德
然後行事此正禮也與道家者流無涉唐宋之世乃
用青詞設素饌親享太清宮玉清昭應宮然後詣郊
壇行禮此何謂哉

蕙田案唐人謂享太清宮享太廟合祭天地
為三大禮宋人因之而郊祀之先必先親享
太廟玉清昭應等宮非禮之禮可謂謬矣丘

氏議之良是但謂未郊之先詣祖廟告祭斯
又何禮耶古禮郊祭自郊祭廟祭自廟祭十
日戒七日齋未聞祭天而先祭廟也宿于齋
宮未聞宿于廟也祇因明代相沿宋制雖不
如唐宋之親享而尚有告廟之文故為是調
停之論耳茲因天寶元年之事為宋明作俑
故載史文而辨之如此後宋代各條並從刪
削因其無與于郊之大典也閱者詳之

又案丘氏大學衍義補作于明代未行分祭之時故其論郊祀全主合祭之說不過回護私心非有獨見也不足置辨故並黜之附識于此

唐書禮樂志玄宗既已定開元禮天寶元年遂合祭天地于南郊其後遂以為故事終唐之世莫能改也

冊府元龜天寶元年二月丙戌詔曰凡所祭享必在躬親朕不親祭禮將有闕其皇地祇宜就南郊合祭三月

丙申合祭天地于南郊

文獻通考天寶元年二月二十日合祭天地于南郊自後有事園丘皆天地合祭若冊命大事告園丘有司行事亦如之

蕙田案郊祀國之大典玄宗甫定開元分祭之禮儀節度數稍稍合于經典乃改元之後不謀于衆輕為更改其侈心肆志之萌于是可見天寶之治所以大異于開元也歟

通典天寶五載詔曰皇王之典聿修于百代郊祭之義
允屬于三靈聖人既因時以制宜王者亦緣情以革禮
且尊莫大于天地禮莫崇乎祖宗嚴配昭升豈宜異數
今蒸嘗之獻既著于恒式南北之郊未展于時享自今
以後每載四時孟月先擇吉日祭昊天上帝其以皇地
祇合祭以次日祭九宮壇皆令宰臣行禮奠祭務崇黜
潔稱朕意焉

蕙田案天地大神祇從無時享之禮四孟所

祭但當有迎氣祀五方帝耳今乃四時合祭
可謂煩數不敬蓋因辨六天者有天安得五
之說遂以分祀五帝之禮移之于天又合之
以地是矯康成而又失之者也

冊府元龜天寶五載十二月辛酉詔曰祈穀上帝春祀
先王永惟因心敢忘如在頃以詳諸舊典創以新儀清
廟陳牲加特于嘗餼昊天冬祭重增以時享况履茲霜
露載感惟深瞻彼郊壇有懷昭事宜以來歲正月朕親

謁太廟便于南郊合祭仍令中書門下即與禮官詳定儀注六載正月戊子親祀南郊遂祀皇地祇

蕙田案天寶元年改分祭為合祭詔謂祭必躬親意蓋知天地之必當親祭而以分祭為勞殺其數也又改冬夏至而用二月則無寒暑之苦矣五年又定南北郊時享于謁太廟之後從其便也至十年郊後遂專委之攝祭而心有不安以親受祝版為禮怠心滋矣自

此以後遂不親郊而十三載之亂作焉

舊唐書玄宗紀天寶九載十一月制自今告獻太清宮及太廟改為朝獻以告者臨下之義故也 十載正月壬辰朝獻太清宮癸巳朝饗太廟甲午有事于南郊合祭天地禮畢大赦天下

禮儀志天寶十載五月己酉郊祭天地以高祖神堯皇帝配座故將祭郊廟告神堯皇帝室

冊府元龜天寶十載正月制曰自今己後攝祭南郊薦

獻太清宮薦享太廟其太尉行事前一日于致齋所具
羽儀鹵簿公服引入朕親受祝版乃赴清齋以展誠敬
蕙田案舊唐書于天寶十三載書二月癸酉
朝獻太清宮甲戌饗太廟新書作壬申癸酉
下皆書受尊號大赦而未嘗言郊通考數玄
宗為五郊而有十三載二月八日未知何據

五禮通考卷十